



Diaranson 1 Maart 2023


Email: IslaOnline@gobierno.aw Tel: 528-4952

ISLA ONLINE

Noticia di Gobierno

2023





PABIEN ARUBA

EAGLE BEACH, BABY BEACH Y ARASHI CLASIFICA DEN TOP BEACHNAN DEN CARIBE Y NA MUNDO

Vision di Ministerio di Infraestructura dunando resultado cu poco fondo

Pa prome biaha den historia, Eagle Beach Aruba ta ricibi e premio maximo como e mihor playa den Caribe a traves di e plataforma renombra Tripadvisor. Gobierno di Aruba pa algun aña caba ta hibando un maneho enfoca riba recuperacion cu atencion riba patrimonionan natural y historico. Prome Minister a expresa cu ta sumamente orguyoso cu e logro aki cual ta duna contenido na e declaracion “Aña di inversion y oportunidad”.

E premio “2023 Travelers Choice Best of the Best Award”, ta wordo otorga a base di ‘reviews’ haci door di bishitantenan riba e website di Tripadvisor. Banda di e hecho cu Eagle Beach a sali number uno den e categoria Caribe, Eagle Beach a clasifica na di dos luga den e top mundial. Otro playanan na Aruba cu tambe a aparece den e top 25 den Caribe ta Baby Beach na number 19 y Arashi an number 23.

Na januari 2022 gobierno a anuncia cu a completa e prome fase di “Proyecto Beach Zand”, cu ta encera e renobacion di playanan rond Aruba. E momento ey a realisa e trabounan na Eagle Beach cu a encera renobacion di e santo blanco pa crea un esfera mas agradabel. Anteriormente a renoba beach na Arashi, Boca Catalina y Fisherman’s Hut (un parti). Otro playanan cu tambe lo ricibi atencion ta entre otro na Ayo, Casibari, Seroe Colorado y San Nicolas.

E comision “Aruba Amenities” tin representantenan di DOW, DIP, DNM, ATA, Ministerio di Finanzas y Cultura, Departamento di Asunto Economico, Museo Arqueologico Nacional Aruba y ECA. Y e miembronan di e comision ta dedica atencion na nos patrimonionan natural y historico pa asina crea programanan di renobacion di e area y facilidadnan y tambe purba crea oportunidadnan nobo pa nos comunidad

Finalizando, Prome Minister a haci un yamada na comunidad pa cuida nos playanan cu ta forma parti di Aruba su patrimonio cultural cu tin gran balor pa pa Aruba. Si cuida nos playanan, nos tur como local y bishitantenan por sigui disfruta di dje.



PROME MINISTER A REUNI CU EMBAHADORA DI MERCA NA HULANDA PA TRATA TEMANAN DI COOPERACION ENTRE ARUBA Y MERCA

E siman aki Prome Minister Evelyn Wever - Croes a reuni cu Embahadora di Merca na Hulanda sra. Shefali Razdan Duggal kende ta na Aruba. Ta apenas algun luna cu sra. Razdan Duggal ta ocupa e funcion como embahadora di Merca na Hulanda y e kier a cera conoci cu Aruba y intercambia riba diferente tema.

Un di e temanan cu a trata ta e situacion di frontera cu Venezuela y con ta bay atende cu esey. Merca a ofrece su ayudo den esaki y a dialoga tocante esey. Un otro tema cu a trata ta recuperacion di Aruba en general, turismo, inversionnan economico y diversificacion di economia.

Prome Minister Wever - Croes a splica e embahadora tocante e oportunidadnan pa Aruba diversifica riba tereno di energia, cual ta un area cu Merca ta hopi interesa pa inverti den dje. Ademá a elabora tocante e plannan di Minister Glenbert Croes y e Hydrogen Valley. Banda di esaki Prome Minister informa sra. Razdan Duggal tocante e situacion preocupante di asilo y imigracion na Aruba, y e situacion cu ta birando peligroso den awanan rond di Aruba pa loke ta droga cu ta sali di Colombia y Venezuela cu ta hopi cerca di Aruba, Aruba, Merca y Hulanda ta trahando duro pa mantene e awanan safe y lo intensiva e cooperacion.

Un otro tema importante cu a trata ta encera traficacion di hende cual lamentablemente ta mirando mas señal di dje na Aruba.

Durante e reunion aki, sra. Jeanette Richardson-Baars kende ta hefe di “Coordination Center on Human Trafficking and Migrant Smuggling Aruba” (CMAA) / Mensenhandel Mensensmokkel tambe tabata presente. Prome Minister a splica cu CMAA tin hopi atencion riba e desaroyonan di traficacion di hende.

Jeanette Richardson-Baars (CMAA)

Durante e reunion sra. Richardson-Baars a splica sra. Razdan Duggal di tur e trabou cu CMAA ta haci contra di traficacion di hende, retonan cu CMAA ta confronta cu ne y kico por haci pa mehora con Aruba ta posiciona riba e tema aki. Segun sra. Richardson-Baars, a ricibi bon sugerencia di e embahadora di areanan cu por pone atencion pa yuda e comunidad Chines y Hindu cual ta un area cu Aruba no tin mucho informacion of di dje, compara cu e poblacion di Venezuela y Colombia. Ademá, sra. Razdan Duggal a ofrece pa brinda su ayudo y



stimula interes riba e tema aki na Hulanda. “Semper ta bon cu un hende riba nivel internacional haci bishita y duna su aporte, sra. Richardson-Baars a enfatisa.

Pa conclui, Prome Minister a expresa cu e bishita tabata uno hopi fructifero, e reunionnan tabata hopi intenso pero hopi bon, unda cu a elabora riba e areanan di cooperacion entre Aruba y Merca.



RESUMEN DI SIMAN

Asuntonan General,
Innovacion,
Organisacion Gubernamental,
Infraestructura y
Planificacion Teritorial

PROME MINISTER, EVELYN WEVER-CROES

19 februari - 24 februari 2023

UPDATE RENOBACION ST. ALOYSIUS SCHOOL

Algun aña pasa alumnonan y maestronan di St. Aloysius school mester a sali di e edificio na Noord pa motibo cu e tabata den mal estado. No tabata tin un plan concreto cu un solucion. Tabata tin hopi discusion pero na mei 2022 colega minister Endy Croes a yega na un solucion cu SKOA. Y awe nos por a mira e avansenan. Prome cu aña escolar nobo nan lo muda bek pa localidadnan completamente renoba. Awe Parlamentarionan a pidi pa haya un update y mi a join nan. Esaki ta duna speransa y animo pa sigui!"



REUNION CU VAN HUFFELEN

Gobierno di Aruba a cuminsa cu e dialogo cu Secretario di Estado Alexandra van Huffelen riba e tema di refinanciamiento y pago di e debe cu Aruba tin cu Hulanda. Un otro tema cu tambe a wordo trata cu Van Huffelen ta e tema di 'onderlinge regeling' di cual tabata falta algun detaye cu mester a wordo finalisa.



BISHITA DI FITCH


Representantenan di FITCH ta na Aruba pa papia cu diferente stakeholder pa haya un miho bista di e recuperacion di Aruba. FITCH tambe ta impresiona cu e recuperacion di Aruba, y nan tambe a realisa cu Aruba tabata un di e paisnan mas afecta door di e pandemia y nan tambe a indica cu ta danki na e desicionnan rapido y firme di Gobierno di Aruba, awe Aruba ta recuperando positivamente. Despues di e bishita aki nan lo bay bek, evalua tur e informacion cu nan a haya pa asina despues di un luna y mei nan publica nan rating nobo pa Aruba.



INAUGURACION HEALTHY LIFESTYLE CENTER ARUBA

Diahuebs a tuma luga inauguracion oficial di e "Healthy Lifestyle Center Aruba" / Centro pa un Estilo di Bida Saludabel. Na e ocasion Prome Minister Evelyn Wever - Croes a hiba palabra poniendo enfasis riba e importancia di hiba un estilo di bida saludabel. Alabes a extende invitacion na tur persona cu kier haci un cambio di estilo di bida pa acudi na e centro cerca e profesionalnan. Realisacion di e proyecto aki no tabata posibel sin e vision y determinacion di Minister Dangui Oduber.





HOH TA LIBER DI HUMA!! IMPLEMENTANDO E LEY DI TABACO!!

Diaranson mainta Dr. Horacio Oduber Hospital (HOH) a tene un conferencia di prensa caminda a declara cu actualmente, es decir desde 1 di maart 2023 nan ta completamente liber di huma. Minister di Turismo y Salud Publico sr. Dangui Oduber tambe tabata presente y ta aplaudi e posicion cu HOH a tuma, e ta un ehempel pa tur e instancianan y companianan di gobierno. E ta un stap importante den cuadro di e implementacion di “Landsverordening Beperking Tabaksproducten (AB 2016 no.41)”.

Manera ta conoci e ley aki a drenta na vigor dialuna 2 di mei 2022. E ley aki ta bay prohibi tur menornan di 21 aña pa cumpra, uza of pa traha den areanan cu ta bende productonan di tabaco. Tambe e ley aki ta prescribe cu ta prohibi pa huma den un edificio of area cu ta accesibel pa tur hende.

Pa e motibo aki HOH a dicidi pa implementa e ley caminda no ta permiti pa huma sigaria, sigaria electronico of cualkier otro producto cu tin como contenido tabaco riba tereno di HOH, LABHOH y Bloedbank ni tampoco paden di edificio, incluyendo e area di parkeo y policlinicanan.

Minister Oduber a señala cu e ley cu ta limita e uzo di poductonan di tabaco ta un di e aspectonan importante den Aruba su plan nacional di prevencion den salud. E ta dedica na mehora e calidad di bida, servicio y salud di Aruba su comunidad.

Minister Oduber ta spera cu mas instancia y companianan cuminsa implementa e ley aki pa asina hunto nos traha riba prevencion y alabes e impacto positivo riba salud publico.






MINISTER ENDY CROES A BATISA UNIFORM NOBO DI S.V. UNISTARS

Diabierna atardi, den un esfera ameno na Oceans na Wayaca Falls a tuma luga bautismo di uniform nobo di ekipo di futbol S.V. Unistars. E aña aki S.V. Unistars ta celebra 35 aña di existencia. Minister Endy Croes y sponsornan: AFAS Software, The Shack Aruba, Povi-Tree y La Quinta tabata presente na e ocasion special aki. S.V. Unistars ta un ekipo di futbol funda pa sr. Roy Croes (q.e.p.d) na aña 1986.

E meta di S.V. Unistars ta pa tene e muchanan di barío for di caya. Pa continua cu e celebracion memey di directiva, hungado, ex – hungado, famia y fanatico ekipo di Unistars a batisa uniform nobo cu e hungadonan lo uza den e weganan binidero. Minister Endy Croes ta felicita directiva y hungadonan di S.V. Unistars alabes ta deseanan hopi exito.



Minister Endy Croes:

TA EXTENDE INVITACION NA E ALUMNONAN DI EXAMENKLAS PA UN ANOCHI INFORMATIVO NA THE MOVIES IMAX NA GLORIA


En conexion cu vivienda pa estudiante na Hulanda



Diaranson mainta, Minister di Enseñansa Endy Croes a bishita Colegio Arubano na Oranjestad. Minister Endy Croes a tene un combersacion cu e studiantenan di examenklas di scol secundario Colegio Arubano cu ta biahando den e luna di augustus di e aña aki na Hulanda pa sigui cu nan estudio. E proposito di e bishita aki ta pa invita dies (10) klas di HAVO di aña cinco (5) y tres (3) klas di VWO di aña seis (6) pa un anochi di informacion na The Movies IMAX na Gloria. Dialuna awo, dia 6 di maart 2023, en conexion cu vivienda pa estudiante na Hulanda.

E anochi informativo aki ta parti den dos seccion, di 6 or di atardi pa 7 or di anochi y di 7 or pa 8 or di anochi. Ta bay tin un lista di plataforma, unda cu e studiantenan por inscribi, pa asina segura cu nan haya camber (studentkamer) na tempo. Minister Endy Croes ta indica cu ta importante pa busca camber trempan, pa asina evita cu e studiantenan yega Hulanda sin tin un vivienda, cual por tin un efecto negativo riba nan scol. Rector di Colegio Arubano Sr. Tim Croes, Conector Sra. Milouschka Boekhoudt-Wernet y Directora di Stichting Voortgezet Onderwijs Aruba (SVOA) Sra. Maya Artist a gradici Minister Endy Croes pa bishita Colegio Arubano y trece informacion valioso pa e alumnonan di examenklas cu ta biahando na Hulanda e aña aki.





ESUN CU YEGA PROME TA BEBE AWA LIMPI Y ARUBA LO TIN E PROME 'HYDROGEN VALLEY' DEN REGION



E ultimo dia na Hulanda di Minister di Energia Sr. Glenbert Croes, tabatin un reunion na Arubahuis unda el a reuni cu Minister Plenipotenciario Sr. Ady Thijsen y CEO di Utilities riba kico ta bay bira e siguiente paso pa haci Aruba Hydrogen Valley un realidad. Pa Minister Croes, no por tarda. Mester actua awor pasobra kier mira desaroyo nobo awor cu e refineria ta cera.

Otro punto di cu a keda discuti durante dicho reunion cu Minister Plenipotenciario, a papia riba Eagle LNG unda mester di cooperacion di Ministerio di Defensa pa loke ta asuntonan cu ta pendiente pa e proyecto Eagle LNG y natural gas supply, entre Eagle LNG cu WEB Aruba N.V. Minister Glenbert Croes a bisa di ta agradecido na gobierno di Hulanda cu nan postura constructivo cu semper ta apoya tur loke ta positivo pa nos isla. Por bisa cu Hulanda ta tumando e leading role den Europa y Aruba ta tumando e leading role den Caribe. Tin un dicho ta bisa cu esun cu yega prome ta bebe awa limpi. Ora cu tuma e pasonan aki lihe, Aruba ta bay ta e prome den region cu

asina un gran inversion y por bira e supplier pa e region. Aruba lo bay tin e refineria di hidrogeno pa ful regio y esey tin beneficio grandi cu ne.

Ta anticipa cu algun pais lo no cana mesun lihe cu Aruba, cual ta pone nos den un posicion di ventaha cu ta crea e posibilida pa nos por bira e distribuidor di hidrogeno produci den e facilidadnan di produccion di Aruba. Cu esaki, nos ta contribui na cero daño na medio ambiente cu Minister Croes ta considera un derecho di gerencia cu ta laga atras pa generacion cu ta sigui nos.

Otro punto cu a reuni tambe cu Minister Ady Thijsen ta pa e preparacion di e studiantenan na Aruba cu mester wordo concientiza riba kico lo ta e futuro. Ta bay uza e conferencia na Mei pa involucra e studiantenan for di middelbare school, EPB, EPI te na Universidad di Aruba. Mester di tur estudiante pa cuminsa concientisa nan riba kico ta e energia y fuel di futuro. Minister Croes a bisa di a haya masha hopi reaccion no solamente di Aruba pero di studiantenan di Aruba na Hulanda y otro pais. Profesionalnan cu ta na otro pais cu tabata traha den e refineria tambe a reacciona y kier bin aporta den Aruba Hydrogen Valley cu lo bira e prome den region di Caribe. E studenten arbeidsmarkt begeleiding lo bay yuda e hoben riba contenido di e profesion. Di enseñansa pa Empleo pa Universidad di Aruba, tur e instancianan ey mester ta involucra pa conscientisa y prepara e hobennan riba loke por ta ofishi-, profesion- y trabounan den e sector aki.

Apesar cu turismo ta keda sagrado pa Aruba y ta e pilar principal di nos economia, e sector Energetico lo bira un pilar economico nobo cu ta bay remplaza esun di refineria. Cu e diversificacion aki, lo haci Aruba economicamente mas resiliente, existente pa cualkier desafio cu Dios mediante nunca mas presenta den nos caminda di loke Aruba a biba e ultimo tres añanan cu e pandemia.

Minister Glenbert Croes:

EAGLE LNG LO TA PARTI DI ARUBA HYDROGEN VALLEY

Durante e rueda di prensa di diamars ultimo, for di un miembro di prensa a haya e pregunta cu si ora di cera e MOU pa Aruba Hydrogen Valley, cu si esaki no lo por conduci na Eagle LNG hala atras. Riba esaki e mandatario a splica cu EAGLE LNG lo forma parti di e Aruba Hydrogen Valley pa motibo cu e zona di refineria lo bira e zona energetico di Pais Aruba unda entre otro Eagle LNG lo wordo ubica.

EAGLE LNG ta parti instrumental pa nos por haci e transicion pa por desaroya Aruba Hydrogen Valley. Manera Minister di Energia a splica, cu LNG por produci e asina yama Blue Hydrogen. Sinembargo e meta ta pa finalmente yega na produccion di Green Hydrogen cu no tin niun emision dañino pa nos medio ambiente y habitantenan di e pueblo di San Nicolas.

Riba e siguiente pregunta cu si ta premira cu Aruba Hydrogen Valley lo por crea mas cupo di trabou, Minister Croes a declara di ta convenci cu henter e inversion aki lo crea cupo di trabou for di laser, pa welder te cu ingeniero como tambe trabounan indirecto manera di contratistanan. “Y esaki ta locual cu tin ami humildemente hopi entusiasmo! Bo sa kico tabata e dolor tur e temponan aki, cu nos a weita Lago cera. Nos a weita Coastal wordo

pasa pa El Paso pa despues Valero y Valero a cera. Nos a weita Citgo cera. E Aruba Hydrogen Valley aki ta bay ta un valley di diferente inversion cu diferente industria na energetico for di generacion pa produccion pa almacenamiento pa distribucion, cu ta bay ta na mi

parecer e di dos industria economico pa futuro.” E ta bay ta un inversion duradero y sostenibel pasobra hidrogeno ta e futuro, cu ta pa largo duracion hasta superando nos propio tempo di bida. Asina sostenibel y importante e sector aki lo ta ofreciendo cuponan di trabou pa largo duracion cu ta locual tambe ta hopi importante pa Minister Croes como e titular di Labor.



Minister Glenbert Croes durante su bishita na Hulanda

A BISHITA VARIOS COMPANIA CU TA INVIRTIENDO DEN ENERGIA LIMPI

Durante conferencia di prensa di gobierno, Minister Glenbert Croes a elabora riba su bishita na Hulanda pa loke ta trata e tema di Hidrogeno. Minister Croes a indica di a bishita Groningen Airport Eelde di Hydrogen Valley mihor conoci como e "Hydrogen Valley Airport", na unda por a mira varios compania manera Airbus cuminsa inverti den avionnan cu lo mester bula den futuro a base di "fuel" limpi. Tambe a mira diferente componentenan manera panelnan solar y molinanan, meymey di e pista di salida y di aterisahe, cu ta wordo uza pa genera electricidad.

Minister Croes a bishita tambe e "Public Transport Authority" na Groningen cu yama Qbuzz, na unda por a mira busnan cu ta core riba hidrogeno. E beneficio di core riba hidrogeno ta cu un persona por core pa e mesun gasto, un distancia hopi mas largo compara cu gasolin. No solamente esaki ta bon pa e medio ambiente pero beneficioso pa e situacion economico di cada persona.

Otro compania cu Minister Croes a bishita durante su estadia na Hulanda ta Holthausen Clean Technology. Akinan Minister Croes a indica di por a admira un Hesla, cu ta un Tesla cu ta core riba hidrogeno. Tambe por a wak e bus- y ekiponan pisa cu ta core riba hidrogeno.

Tambe Minister Croes a bishita e waf di Eemshaven na unda

por a mira meymey di e waf, molinanan di biento, panel solar, "tank farms" y facilidadnan di produccion cu tambe lo bay den transicion pa energia limpi. E area aki di Eemshaven a wordo designa pa tur inversion ta di electricidad limpi. Aki ta unda cu ta genera y produci un tercera parti di electricidad pa Hulanda completo. Mirando con hopi energia ta yega na e zona aki, e compania mundialmente conoci manera e.o. "GOOGLE" a dicidi di pone su datacenter na e localidad ey.

Minister Croes a splica cu esaki ta e vision cu gobierno tin pa loke ta e "Aruba Hydrogen Valley" y ful e zona di refineria. Tur loke ta mustra bieu lo wordo reemplasa pa facilidadnan di produccion moderno na unda lo no tin huma preto mas, cual ta di beneficioso pa Aruba y su medio ambiente.

Pa Gobierno di Aruba tabata un honor di por a cera conoci cu sr. Patrick Cnubben cu ta e arkitecto di ful e desaroyo di hidrogeno pa Hulanda y paisnan nordico den Norte di Europa. Tambe Minister Croes ta contento di por tabatin e oportunidad di bishita e diferente companianan cu ta invirtiendo den energia limpi. Minister President Evelyn Wever-Croes tempo cu e tabata e minister encarga cu energia, a inclui hidrogeno den su plannan. “Y mi ta reconoce e pasion di mi coleganan di RAIZ pa cu hidrogeno y p’esey como Minister di Energia, mi ta contento di por ta e motor pa haci e vision aki un realidad.”

UNION TA E FORSA DI NOS BARANCA TAN STIMA.

POETA DI PATRIA 2023

FECHA: DIARANSON 15 DI MAART 2023

ORA: 7:00 PM – 10:00 PM

LUGA: CAS DI CULTURA

ENTRADA GRATIS

PROME PREMIO
AWG. 1000,-

SEGUNDO PREMIO
AWG. 500,-

TERCER PREMIO
AWG. 250,-


Ultimo dia pa inscribi ta diabierna dia 3 di maart 2023.
Ultimo dia pa entrega poema ta dialuna dia 6 di maart 2023
Mail bo poema na: artedipalabra@gmail.com



RECONOCE BO IMPACTO PA BO DESPERDICIO RESIDENCIAL OF COMERCIAL:



(Aruba's waste management blueprint)



Bo kier haci mas?



E herarkia di desperdicio ta indica e impacto di e metodo cu ta wordo uza pa procesa desperdicio.



Ministerio di Transporte, Integridad,
Naturalesa y Asuntunan di Adulto Mayor

"Nada no ta cambia, si nada no cambia!
Reconoce bo impacto, un Aruba dushi ta un Aruba cu nos por maneha nos sushi!"
Minister Ursell Arends

www.trashtocasharuba.org


Pa mas informacion:
<https://trashtocasharuba.org/pages/dump-parkietenbos>



Historia di nos pais
a demostra con mas
fuerte nos por ta, si nos Uni.
Diferencia di opinion por t'ey,
contal cu semper tin respet.
Y irespecto e diferencia
di opinion, ora ta trata
di ARUBA, mas uni nos ta,
mas fuerte ARUBA ta.

Den 2023, Ban uni
pa enfrenta e retonan hunto,
y pa carga e exito hunto.
Uni nos lo atende cu e
retonan nobo pa crea
solucion, oportunidad
y un base solido
pa progreso y felicidad
pa un y tur den
nos comunidad.

**UNION A
DEMOSTRA CON
MAS FUERTE NOS
POR TA PA
CARGA E EXITO
DI NOS PAIS!**



—AÑA DI UNION Y POSITIVISMO!—

